

BERGRIVIER MUNISIPALITEIT VERORDENING INSAKE STORMWATERBESTUUR

Kragtens die bepalings van artikel 156 van die Grondwet van die Republiek van Suid-Afrika, 1996, verorden die Bergrivier Munisipaliteit soos volg:-

Inhoudsopgawe

1. Woordomskrywing
2. Doel van verordeninge
3. Toepassing van verordeninge
4. Verbode gedrag
5. Toepassing en voorwaardes wat die munisipaliteit mag instel
6. Stormwaterstelsels op privaat grond
7. Bevoegdheide van munisipaliteit
8. Waarmarking en betekening van kennisgewings en ander dokumente
9. Appèl
10. Vrystellings
11. Strafbepalings
12. Teenstrydigheid met ander wetgewing - ontbreek Eng teks
13. Herroeping van verordeninge
14. Kort titel en inwerkingtreding

1. **Woordomskrywing**

In hierdie verordening, tensy dit uit die samehang anders blyk, het die volgende woorde die volgende betekenis:

“**beboude gebiede**” die gedeeltes of gebiede van die munisipaliteit wat deur fisiese opmeting in erwe verdeel is of wat deur opgemete erwe omring word en ingeslote die openbare paaie aangrensend daaraan;

“**besoedel**” die mening wat deur die Nasionale Waterwet, 1998 (Wet 36 van 1998) daaraan toegeskryf is;

"**munisipaliteit**" beteken die Bergrivier Munisipaliteit wat ingevolge Artikel 12 van die Wet op Munisipale Strukture, 117 van 1998, ingestel is en sluit alle politieke strukture, politieke ampsdraers, raadslede, behoorlik gemagtigde agente of alle werknemers in wat ingevolge hierdie verordening optree uit hoofde van 'n bevoegdheid wat by die munisipaliteit berus en aan sodanige politieke struktuur, politieke ampsdraer, raadslid, agent of werknemer gedelegeer of gesubdelegeer is;

“**privaat stormwaterstelsel**” ‘n stormwaterstelsel wat deur 'n persoon wat nie die munisipaliteit is nie, besit, bedryf en in stand gehou word;

“**staatsorgaan**” die betekenis wat ingevolge Artikel 239 van die Grondwet daaraan toegeskryf word.

“**stormwater**” water afkomstig van natuurlike reënval of die opgaar daarvan, en sluit in:

(a) grondwater en fonteinwater wat normaalweg deur die stormwaterstelsel gevoer word; en

(b) seewater binne riviermondings, maar sluit water in ‘n drinkwater- of afvalwaterretikulasiestelsel uit;

“**stormwaterstelsel**” sowel geboude as natuurlike fasiliteite, met inbegrip van pype, duikers, waterlope en die gepaardgaande vloedvlaktes, hetsy bo of onder openbare of privaat grond, wat gebruik word vir die bestuur, opgaar, afvoer, tydelike bewaring, beheer, monitering, behandeling, gebruik of wegdoening van stormwater;

“**vloedvlakte**” grond langs ‘n waterbron wat geneig is om herhalend in 100-jaar siklusse te oorstroom; en

“**waterloop**” die betekenis wat ingevolge die Nasionale Waterwet, 1998 (Wet 36 van 1998) daaraan toegeskryf word;

2. Doel van verordeninge

Die doel van hierdie verordening is om stormwaterbestuur en -aktiwiteite wat moontlik ‘n nadelige uitwerking op die ontwikkeling, bedryf en instandhouding van die stormwaterstelsel mag hê, te reguleer.

3. Toepassing van verordeninge

Hierdie verordening bind ‘n staatsorgaan is van toepassing op stormwaterstelsels in beboude gebiede.

4. Verbode gedrag

(1) Niemand mag, sonder die skriftelike toestemming van die munisipaliteit –

(a) die volgende in die stormwaterstelsel laat afvoer, plaas of toelaat dat dit die stormwaterstelsel binnegaan nie –

(i) enigiets anders as stormwater;

(ii) enigiets wat die stormwaterstelsel waarskynlik sal beskadig of die werking daarvan sal beïnvloed;

(iii) enigiets wat die water in die stormwaterstelsel waarskynlik sal besoedel;

- (b) enige materiaal wat nie stormwater is nie, van enige plek afvoer of op enige oppervlak plaas waar daardie materiaal redelikerwys in die stormwaterstelsel kan beland;
 - (c) enige stap doen wat die stormwaterstelsel of die werking daarvan waarskynlik sal vernietig, beskadig, in gevaar stel of daarmee inmeng nie, welke handeling die volgende insluit, maar nie daartoe beperk is nie –
 - (i) versperring of vermindering van die kapasiteit van die stormwaterstelsel;
 - (ii) oopmaak van 'n pyp, waterloop of kanaal wat deel van die stormwaterstelsel uitmaak;
 - (iii) versperring of oprigting van enige struktuur of ding oor of in so 'n posisie of op so 'n manier dat die stormwaterstelsel of die werking daarvan vernietig, beskadig, in gevaar gestel of daarmee ingemeng word;
 - (iv) die dreinering, uittrekking of afleiding van enige water regstreeks uit die stormwaterstelsel;
 - (v) die opvul, uitgrawe, vorming, landskappering, oopmaak of verwydering van die grond bo, binne, onder of reg langs enige deel van die stormwaterstelsel;
 - (vi) verandering van die ontwerp of die gebruik van of andersins die wysiging van enige kenmerk van die stormwaterstelsel wat op sigself of in kombinasie met ander bestaande of potensiële grondgebruike die vloedvlakke kan laat styg of 'n potensiële vloedgevaar kan skep; of
 - (vii) enige aktiwiteit wat op sigself of in kombinasie met ander bestaande of toekomstige aktiwiteite 'n styging in vloedvlakke kan veroorsaak of 'n potensiële vloedrisiko kan skep.
- (2) Geen persoon mag enige aktiwiteit onderneem wat veroorsaak dat stormwater die eiendom van die munisipaliteit of enige ander persoon oorstroom, of die risiko van sodanige oorstroming veroorsaak nie.
- (3) Wanneer 'n insident beoog in subartikel (1)(a) of (b) sonder die toestemming van die munisipaliteit voorkom –
- (a) indien die insident nie die gevolg van natuurlike oorsake is nie, moet die persoon wat vir die insident verantwoordelik is; of
 - (b) die eienaar van die eiendom waarop die gebeurtenis plaasgevind het of besig is om plaas te vind, die insident onmiddellik by die munisipaliteit aanmeld en op eie koste alle

redelike maatreëls tref om die uitwerking van die insident te beperk, welke maatreëls die instel van opruimingsaksies met inbegrip van die rehabilitering van die omgewing, insluit maar nie daartoe beperk is nie.

- (4) 'n Persoon wat 'n bepaling van subartikel (1), (2) of (3) oortree, pleeg 'n misdryf.

5. Aansoek en voorwaardes wat die munisipaliteit mag instel

(1) 'n Persoon wat die toestemming van die munisipaliteit wil verkry, soos beoog in artikel 4, moet 'n aansoekvorm indien wat van die munisipaliteit verkrygbaar is.

(2) By die oorweging van 'n aansoek kan die munisipaliteit die aansoeker vra om die munisipaliteit, op eie koste, te voorsien van impakstudies wat omgewingsimpakstudies of omgewingsimpakondersoeke wat ingevolge omgewingswetgewing vereis word kan insluit, maar nie daartoe beperk is nie.

(3) Die munisipaliteit mag die aansoeker ook gelas om dokumentasie oor vloedlyne te vind en te voorsien.

6. Stormwaterstelsels op privaat grond

(1) 'n Eienaar van eiendom waarop 'n privaat stormwaterstelsel geleë is –

(a) mag geen aktiwiteit uitvoer wat afbreuk kan doen aan die doeltreffende funksionering van die stormwaterstelsel of wat redelikerwys verwag kan word om afbreuk te doen aan die doeltreffende funksionering van die stormwaterstelsel nie; en

(b) moet die stormwaterstelsel op eie koste doeltreffend aan die werk hou met inbegrip van, na 'n skriftelike opdrag van die munisipaliteit, die opknapping en herkonstruksie daarvan indien die munisipaliteit redelike gronde vir die uitreiking van sodanige opdrag het.

(2) Subartikel (1)(b) is nie van toepassing indien die munisipaliteit verantwoordelikheid aanvaar het vir enigeen van die pligte vervat in 'n onderhoudsooreenkoms of ingevolge 'n voorwaarde van 'n serwituut nie.

(3) Indien 'n eienaar versuim of weier om te voldoen aan 'n instruksie wat die munisipaliteit ingevolge subartikel (1)(b) uitreik, kan die munisipaliteit maatreëls instel om die stormwaterstelsel op te knap of te herbou, en die munisipaliteit kan alle redelike koste wat as gevolg van die stappe wat gedoen is, aangegaan is, van die eienaar verhaal.

(4) 'n Eienaar wat 'n bepaling van subartikel (1)(a) oortree of wat versuim of weier om te voldoen aan 'n opdrag beoog in subartikel (1)(b), pleeg 'n misdryf.

7. Bevoegdhede van munisipaliteit

(1) Die munisipaliteit mag enige perseel of enige gedeelte daarvan op alle redelike tye binnegaan met die doel om 'n inspeksie of toets uit te voer om die huidige status van 'n stormwaterstelsel te bepaal.

(2) Die munisipaliteit mag, vir die doel om infrastruktuur vir 'n stormwaterstelsel te voorsien en in stand te hou –

- (a) op enige perseel enige drein, pyp of ander struktuur wat met die stormwaterstelsel verband hou, op of onder enige onroerende eiendom bou, uitbrei, wysig, instandhou of lê en mag enige ander stappe doen wat nodig of wenslik is of verband hou met, of aanvullend of bykomstig is tot sodanige konstruksie, uitbreiding, wysiging of instandhouding;
- (b) stormwater of afvoerwater uit enige munisipale dienswerke in 'n waterbron dreineer;
- (c) enige skade wat gedoen is of skade wat voortspruit uit 'n oortreding van artikel 4(1)(a)(ii) of 4(1)(c) soos die volgende, maar nie daartoe beperk nie, herstel en regmaak –
 - (i) sloping, wysiging of ander hantering van enige gebou, struktuur of ander ding wat in stryd met artikel 4(1)(c)(iii) gebou, opgerig of gelê is;
 - (ii) invul, verwydering en regstelling van enige grond wat in stryd met artikel 4(1)(c)(v) uitgegrawe, verwyder of geplaas is.
- (d) enigiets verwyder –
 - (i) wat in stryd met artikel 4(1)(a) of (b) in die stormwaterstelsel of waterloop afgevoer is of toegelaat is om dit binne te gaan;
 - (ii) wat enige deel van die stormwaterstelsel beskadig, versper of bedreig of dit waarskynlik sal versper, in gevaar stel of vernietig;
- (e) enige afvoerpunt vanaf enige perseel, ongeag of die punt vir wettige doeleindes gebruik word al dan nie, afseël of blokkeer;
- (f) enige toestemming wat ingevolge artikel 5 verleen is, kanselleer indien daar nie aan enige voorwaarde waarkragtens die toestemming verleen is, voldoen word nie;

- (g) by wyse van skriftelike kennisgewing, opdrag aan enige eienaar van eiendom gee –
 - (i) om stormwater op sodanige eiendom te behou of om op die koste van sodanige eienaar ‘n stormwaterdreineerpyp of afvoersloot na ‘n geskikte plek wat deur die munisipaliteit aangedui word, te lê, ongeag of die pyp of afvoersloot oor privaat eiendom sal loop al dan nie;
 - (ii) om die eienaar van ‘n hoërliggende eiendom toe te laat om ‘n stormwaterdreineerpyp of afvoersloot oor sy of haar eiendom te lê ten einde gekonsentreerde stormwater te dreineer;
 - (h) stormwater in enige waterbron, hetsy dit op privaat grond is al dan nie, af te voer.
- (3) Indien ‘n eienaar van eiendom versuim om te voldoen aan ‘n opdrag beoog in subartikel (2)(g)(i), kan die munisipaliteit maatreëls tref om sodanige stormwater terug te hou of om ‘n stormwaterdreineerpyp of afvoersloot te lê.
- (4) Waar dit voorkom asof enige optrede of versuim deur ‘n persoon of die eienaar van ‘n eiendom kan lei tot ‘n oortreding van ‘n bepaling van hierdie verordening, kan die munisipaliteit sodanige persoon of eienaar skriftelik gelas om te voldoen aan ‘n vereiste ten einde te voorkom dat sodanige oortreding geskied.
- (5) Die munisipaliteit mag alle redelike koste wat aangegaan is as gevolg van optrede geneem –
- (a) ingevolge subartikel (2)(c) of (d), verhaal van die persoon wat verantwoordelik was vir die oortreding van die bepalings van hierdie verordening of die eienaar van die eiendom waarop ‘n oortreding geskied het; of
 - (b) ingevolge subartikel (3), van die eienaar van die eiendom.
- (6) Enige drein, pyp of struktuur wat ingevolge subartikel (2)(a) voorsien is, word die eiendom van die munisipaliteit.
- (7) ‘n Persoon pleeg ‘n misdryf indien hy of sy –
- (a) versuim om te voldoen aan ‘n kennisgewing beoog in subartikel (2)(g);
 - (b) ‘n werknemer of kontrakteur van die munisipaliteit in die uitvoering van enige magte of die verrigting van enige funksie of plig ingevolge hierdie verordening dreig, teenstaan, hinder, belemmer of hom of haar andersins pla of vuiltaal of skeltaal teenoor hom of haar gebruik; of

- (c) hom of haar as 'n werknemer of kontrakteur van die munisipaliteit voordoën.

8. Waarmerking en betekening van kennisgewings en ander dokumente

- (1) 'n Bevel, kennisgewing of ander dokument wat deur die munisipaliteit gewaarmerk moet word, moet behoorlik onderteken wees.
- (2) Enige kennisgewing of ander dokument wat ingevolge hierdie verordening aan 'n persoon beteken word, word geag as beteken te wees wanneer dit ooreenkomstig Artikel 115(1) van die Wet op Plaaslike Regering : Munisipale Stelsels, Wet 32 van 2000, beteken is.
- (3) Betekening van 'n afskrif word geag betekening van die oorspronklike te wees.
- (4) Enige regsgeeding is doelmatig en genoegsaam aan die munisipaliteit beteken wanneer dit by die munisipale bestuurder of 'n persoon wat by die munisipale bestuurder se kantoor is, afgelewer is.

9. Appèl

'n Persoon wie se regte geraak word deur 'n besluit wat deur die munisipaliteit gedelegeer is, mag ingevolge Artikel 62 van die Wet op Plaaslike Regering : Munisipale Stelsels, Wet 32 van 2000 teen daardie besluit appèl aanteken deur binne 21 dae van die kennisgewing van die besluit skriftelike kennis van die appèl en die redes daarvoor aan die munisipale bestuurder te gee.

10. Vrystellings

- (1) Enigiemand mag by wyse van 'n skriftelike aansoek, waarin die redes volledig verstrek word, by die munisipaliteit aansoek doen om vrystelling van enige bepaling van hierdie verordening.
- (2) Die munisipaliteit mag –
- (a) skriftelik vrystelling verleen en die voorwaardes waarvolgens en die tydperk waarvoor sodanige vrystelling verleen word, moet in die vrystelling uiteengesit word;
 - (b) enige vrystelling of voorwaarde van 'n vrystelling verander of kanselleer; of
 - (c) weier om vrystelling te verleen.
- (3) 'n Vrystelling tree nie in werking voordat die aansoeker skriftelik onderneem het om aan alle voorwaardes wat die Munisipaliteit ingevolge subartikel (2) opgelê het, te voldoen nie, en indien daar met 'n aktiwiteit

begin word voordat sodanige onderneming aan die munisipaliteit voorgelê is, verstryk die vrystelling.

(4) Indien daar nie aan enige voorwaarde van 'n vrystelling voldoen word nie, verval die vrystelling onmiddellik.

11. Strafbepalings

'n Persoon wat enige bepaling van hierdie verordening oortree of versuim om daaraan te voldoen, pleeg 'n misdryf en kan by skuldigbevinding –

- (a) 'n boete of gevangenisstraf opgelê word, of sodanige boete of gevangenisstraf, of beide sodanige boete en sodanige gevangenisstraf; en
- (b) in die geval van 'n voortgesette misdryf, 'n bykomende boete of 'n bykomende tydperk van gevangenisstraf of sodanige bykomende gevangenisstraf sonder die opsie van 'n boete of beide sodanige bykomende boete en gevangenisstraf vir elke dag waarop sodanige misdryf voortduur; en
- (c) 'n verdere bedrag gelyk aan enige koste en uitgawes wat die hof bevind deur die munisipaliteit aangegaan is weens sodanige oortreding of versuim.

12. Teenstrydigheid met ander wetgewing

In die geval van teenstrydigheid tussen enige bepaling van hierdie verordening en Nasionale- en Provinsiale wetgewing, standarde, beleid of riglyne, sal sodanige Nasionale- en Provinsiale wetgewing, standarde, beleid of riglyne voorrang geniet.

13. Herroeping van verordeninge

Die bepalinge van enige verordeninge wat voorheen deur die munisipaliteit of deur enige van die afgeskafte munisipaliteite wat nou in die munisipaliteit geïnkorporeer is, afgekondig is, word hiermee herroep insoverre hulle betrekking het op sake waarvoor daar in hierdie verordening voorsiening gemaak word en insoverre dit toepaslik gemaak is op die munisipaliteit deur die magtiging vir die uitvoering van magte en funksies ingevolge Artikel 84(3) van die Wet op Plaaslike Regering : Munisipale Strukture, Wet 117 van 1998.

14. Kort titel en inwerkingtreding

Hierdie verordening is die Verordening insake Stormwaterbestuur en tree in werking op die datum van publikasie in die Provinsiale Koerant.

